

觀
象
玩
占



卷之一



觀象玩占目錄卷之一

天論第一卷

天體

天變異占

天雨異物占

天火占

第二卷

日總叙

日變占

日食叙

日四時食占

第三卷



日食十二月占

日食十干十二支占

日食六十甲子占

第四卷

月總叙

月變異占

月食占

月食十二月占

月五星相干犯占

月暈五星占

流星客星彗星犯月占

第五卷

五星總叙

五星占法

五星占

觀象玩占卷之一

天論

天體

古之言天凡有八家一曰渾天即今所載張衡靈憲
是也二曰宣夜絕無師學三曰蓋天周髀所載四
曰軒天姚信所說五曰穹天虞偉所擬六曰安天
虞喜所述七曰方天王充所論八曰四天祇胡寓
言獨渾天一家最為近理故李淳風獨取靈憲載

之乙巳占首其文曰昔在先生將步天路定靈軌
尋緒本元先準之於渾體是為正儀立度而皇極
有建也樞運有機也乃建乃機期經天常理人無
心因茲以生心故靈憲作曰大素之前幽清玄靜
寂寞默不可為象殿中之為虛殿外惟知無如是
者永久焉斯謂溟滓蓋乃道之根也道根建自有
大素始萌而未兆並氣同色混沌不分故道志之
至言有物渾成先天地生其體故未可得而形也

其遲速故未可得而紀也如是者人永久焉斯謂
蓋乃道之幹也道幹既育有物成焉於是元氣剖
斷剛柔始分清濁異位天成於外地定於內天體
於陽故圓以動地體於陰故平以靜動以行施靜
以合化理時育類所謂天元蓋乃道之實也在天
成象在地成形天有九位地有九域天有三辰地
有三形有辰可效有形可度情性萬殊旁通感應
自然相生莫之能紀於是人之精者作聖實始於

綱紀經緯之八極地之維經二億二萬二千一百
里南北短減千里東西則廣增千里自地至天半
如八極則地之深亦如通而度之則是渾矣將復
其數用重勾股懸天之景薄地之儀皆移千里而
差一寸得之由此而往者未之或知未之知者宇
宙之謂也宇之表無極宙之表無窮天有兩儀以
儻道中其可觀樞星是也謂之北極在南者不著
故聖人弗之名焉其世之遂九分而減二陽道左

迴故天運右行有驗於物則人氣左羸形左驗也
天以陽迴地以陰浮是故天致其功稟氣舒光致
其靜以施地天以順動以失其中則四序順致寒
暑不忒死生有節故品物用生地以靈靜合會承
天之清化至養四時而後育故品物用成凡至大
莫若天至厚莫若地至多莫若水水精焉漠周於
天而無別焉地有山嶽以宣其氣精重為星星也
者體生於地精成於天列居差錯時各有所屬紫

宮為皇極之居太微為五帝之廷明堂之房角有
席天市中座倉龍連蟠於左白虎猛而踞於右朱
雀奮翼於前靈龜圖首於後黃帝軒轅於中六擾
既畜而狼旣魚鱉罔有不具在野象物在朝象人
象事於是備矣懸象著明莫大乎日月其經當天
周七百三十六分之一地廣二百四十二分之一
日者陽精之宗積而成象鳥而有三趾陽之精其
數奇月者陰精之宗積而成象兔陰之精其數

偶夫日比猶火月比猶水火則外光水則含景故
月光生於日之所照魄生於日之所蔽當日則光
盈就日則光盡衆星被耀因水轉光當日之所充
光常不合者蔽於地是謂闇虛在星星微過月月
蝕之日薄地闇其明絲闇視明明無所 是以望
之若夫方於中天天地同明絲明瞻闇闇還自會
故望之若小夫當夜而揚光在晝則不明也月之
於夜與日同而差微星則不然強弱之差也衆星

列布其以神著有五列焉是為三十五名一居中
央謂之北斗動變占失司王命布於四方為二十
八宿日月運行歷示吉凶五位躔次周告禍福則
天心於是見矣中外之官常明者百二十有四可
明者三百二十為星五百二十而海人之占未存
焉微星之數蓋萬一千五百二十庶物蠢蠢咸得
繫命不然何以摠而理諸夫三光形存焉有似珠
玉神奇守精存履其職而宣其明及其衰也神歌

精數於是乎有隕星然則奔星之所墜至地則石
矣文曜麗乎天其動也七星日月五星是也周旋
右迴天道者貴順也近天則遲遠天則速行行則
屈屈則留迴則逆逆則遲迫於天也行遲者觀之
於東東屬陽行速者視之於西西屬陰日旦月夕
此配合也攝提熒惑鎮星候晨見依於日也太白
辰星候昏見附於月也三陽二陰三天兩地故男
女取則焉方星巡鎮必因常度或苟盈縮不逾於

次故有司作史曰老子四星周伯王蓬絮芮各一
星錯乎五緯之間無期其行無度審而察之然後
吉凶宜用其詳可度矣

蔡邕曰古之言天者三家曰宣夜曰蓋天曰渾天宣
夜之學絕蓋天術數其存考驗天狀多有違失獨
渾天近得其理今銅儀即其法也立八尺之圓體
以其天地之形以正黃赤察發斂行日月步五緯
精深微妙百代不易之道也今按舜典在璇璣玉

衡以齊七政則唐虞之時也用渾天之法其他妄
說不待而自破矣

王蕃曰天地之體狀如烏卵天包地外猶殼裏黃無
端其形渾渾然曰渾天周天三百六十五度五百
八十九分之一百八十二度半半覆地上半在地
下其二端謂之南北極北極出地三十六度南極
入地三十六度兩極相去一百八十二度半強統
北極經七十二度恒見不隱統南極七十二度恒

隱不見赤道帶天之弦去南極各九十一度少強
黃道者日行所也半在赤道內半在赤道外與赤
道東交於角五度少弱西交於奎十四度少強出
赤道外最遠二十四度斗二十一度是也是為冬
至日之所在入赤道內最遠者亦二十四度井二
十五度是也是為夏至日之所在冬至日在南斗
二十一度去極一百一十五度少強是日最近於
南去極最遠故景最長黃道至斗二十一度出辰

入申故日出辰入申晝行地上百有四十六度少
強故日短夜行地下二百一十九度少弱故夜長
自南至之後漸漸而北故其景漸漸而短日行地
上分數漸多夜行地下分數漸少故日漸長而夜
漸短也稍北而極星於夏至日在東井二十五度
去極六十七度少強是日最近於北去極最近故
景漸最短黃道至井二十五度出寅入戌故日出
寅入戌晝行地上二百一十九度少弱故日長夜

行地下百四十六度少強故夜短自北至之後漸
漸而南故其景漸漸而長日行地上分数漸少夜
行地下分数漸多故日漸短而夜漸長也稍南而
極至於冬至又復如斗二十一度并二十五度南
北相覺四十八度春分日在奎十四度稍長秋分
日在角五度少弱此黃赤二道之交中也去極九
十一度少強南北處斗二十一度并二十五度之
中故景至二至長短之中奎十四度角五度黃道

出卯入酉故日出卯入酉也晝行地上夜行地下
俱一百八十二度半強故日見之漏五十刻不見
之漏五十刻謂之晝夜同為分人之晝夜以昏明
為限故日未出二刻半而明日已入二刻半而昏
故損夜五刻以益晝故春秋分晝漏五十五刻三
光之行有常術家以筭求之各有其同故諸家曆
法參差不一洛書甄曜春秋考異郵皆去周天一
百七萬一千里為度二千九百三十里七十一步

二尺七寸四分四百八十七分分之三百六十二
冬至日之所在六萬里北極下地高於外衡下地
亦六萬里外衡至高北極下地二萬里天地隆高
相從日去地常八萬里日麗天而平轉分冬夏之
間日所行道為七冲六間每冲周經里數各依筭
術用勾股重差推晷景以測遠近地之數皆得於
表也

天變異占

天忽變色是謂異常四夷來侵不出八年有兵戰
天色赤黃而如火濁氣四塞天下蔽賢絕道人主絕
世京房曰聞善不與茲謂不知厥異黃殿咎聲殿
灾不嗣

天日入時忽有赤光燭地行人有影有反者

漢成帝建始元年四月辛丑夜天西北有火光
寅晨有大風從西北起雲氣赤黃四塞竟起蔽日
是時大將軍鳳始用事王氏兄弟五人皆封列侯

卒移漢祚

天晝晦臣制君晝晦見星國亡

天沉陰日月無光晝不見日夜不見星有雲障而無
兩此謂君臣俱有陰謀若相敵相當則為陰相圖
謀若晝陰而夜日出則為君謀臣夜陰而晝日出
為臣謀君夏侯勝曰天久陰而不雨臣下有謀上
者劉向曰王者失身蔽其明則久陰

吳孫亮太平三年自八月沉陰不雨四十日餘是

其聲若雷十二月戊申天西北裂有光如火卒有
侯景之亂

天鳴有聲至尊有驚此亂之所生也或曰天鳴有聲
君死民哭京房曰萬姓勞厥妖天鳴世主失行不
出三年一曰天鳴如風水相薄亂臣作人主憂一
曰天鳴其下有立王一曰刑殺失當民流亡

晉元帝大興二年八月戊戌天鳴東南有聲如風
水相薄三年十月壬辰又鳴至甲午止其後王敦

入石頭城王師敗績帝屈尊於強臣既而晏駕大
恥不雪

晉安帝隆安五年天東鳴六年九月東南又鳴其
後桓溫篡位晉祚卒移於宋

義熙元年八月天鳴在東南是時安帝雖反正而
兵革歲動衆庶勤勞也

陳宣帝大建十三年九月癸未夜天東南有聲如
風水相激三夜乃止十四年八月癸未天有聲如

時故孫綝謀洩九月戊午綝以兵圍宮廢亮為會
稽王 隋開皇二十年十月久陰不雨獨孤后與
楊素共譖太子勇廢之

天裂陽不足也是謂臣強下將害上國欲分裂

天裂見人共起國亡 天裂下人言者善惡如其言

天裂見牛馬豕天下庶民皆憂

天裂見光流血滂沱

漢惠帝二年天開東北廣十丈長二十餘丈其時

呂后臨朝干位卒有兵亂 晉惠帝元康二年

天西南大裂是時人主昏蒙后妃專制大安二年

八月庚午天中裂為二有聲如雷者三是時諸王

迭專威命國遂亡晉天下分裂 穆帝昇平五

年八月己卯天中裂廣三四丈有聲如雷野雉皆

鳴是時哀帝荒疾海西失德皇太后臨朝總萬機

桓溫專權威內外陰氣盛陽氣微 梁武帝太

清二年六月天裂西北長十丈濶二丈光出如電

風水相激九月辛亥天東北有聲如虫飛漸移西

北 後主至德元年九月丁巳天東南有聲如

虫飛十二月戊午夜天開自西北至東南其內有

青黃雜色隆隆若雷聲

隋開皇二十年四月天有聲如瀉水自南而北其

年十月廢太子勇為庶人

唐天寶十四年五月天鳴有聲如雷至十一月而

安祿山反

唐天復二年十一月天鳴東南聲如雷明年而帝蒙塵

天雨異物占

凡天雨下物非人所常見者皆大兵之兆其灾見所主國分

天雨土君失時封五行傳是為黃青土失其性百姓勞苦無功京房曰内淫亂百姓勞不有者尸祿則天雨土下民叛人民負子莫知其鄉易姓侯曰主

不安外戚有謀

天雨石為政者質信不施為詐妄行國君死亡一曰天雨石民流亡兵起君戮甘氏曰無雲而雷墮石墮地大及一丈形如雞子兩頭銳名曰天鼓所下之邦必有大戰伏屍數萬不可救

天雨沙民饑君失國

天雨灰君暴虐無道則天雨灰其國亡殷紂之時天雨灰其後卒有牧野之敗以亡墨子曰商紂不德

十日雨土于堯

宋襄公時雨石於宋五其後與楚會于孟身卒執
國伐又戰而敗于泓傷股而歸竟死宋遂大弱
梁武帝大同元年天雨土二月雨灰其色黃是時
帝溺於佛捨身為奴卒有侯景之亂

後周大義二年天雨細黃土移時乃止是宣帝昏
狂日甚其年崩靜帝立禪於隋

隋開皇二年京師雨土是時發卒起仁壽宮頽山

堙谷死者大半其後諸王各謀亂逆土失其性也

天雨禽獸是時不祥不出三年其下兵起一曰民流
亡有喪

天雨人是謂凶殃不出一年天下易主

天雨魚鼈民流亡臣專政有兵喪

漢成帝時天雨魚長五寸以下是時漢道陵夷王
氏專政

蜀王李期時天雨魚于宮中其色黃是年期為李

壽所殺

天雨虫傳曰人君暴虐不親骨肉而親他人故虫從
天而墜其國受災并起劉向曰刑法暴虐貪叨無
厭則天雨虫

魯文公三年秋雨虫於宋是時宋公暴虐其後國
亂殺大夫而非其罪是其應也

天雨膏是謂陽消王者德衰令不行倭人進用不出
三年有内爭易飛侯曰師將破亡一曰其國大饑

人相食

天雨筋其國大饑

天雨膏將敗國有急一曰君暴虐弼臣多貪賢士遠去
天雨肉天不享其德將易其君一曰君不道臣專政
有兵亂國亡

天雨血是謂天見其妖不出三年兵起京房曰臨獄
不解茲謂進非厥咎天罰故天雨血茲謂不覩民
有怨恐不出三年亡其宗人又曰功臣乘膠奸人

用則天雨血一曰天雨血不出之君不得久居其
宮又曰民勞苦則天雨血其君死於兵及易妖占
曰王者不親九族則天雨血不救則國亡身慘
天雨毛邪臣進用賢人逃貴臣出走京房曰天雨毛
貴人憂國易王征後煩興戶口彫散國饑民流下
人相食一曰大風為災

天雨羽君德不通逆施天下天鏡占曰天雨羽毛有
喪不出九年兵起易飛侯曰天雨羽毛大風為災

齊湣王時天雨血於羸博之間沾衣于是燕師入
齊王出走為淳齒所殺

漢惠帝二年天雨血于野陽一頃所劉向曰以為
赤青也時諸呂用事讒口妄行殺三皇子建立非
嗣及呂后崩大臣共滅諸呂僵尸流血京房曰歸
獄不解茲謂迫非厥咎天雨血茲謂不親民有怨
心不出三年無真宗人又曰佞人祿功臣慘天雨
血

漢哀帝建平四年四月山陽雨血廣三尺長五尺

大者如錢小者如麻子後二年帝崩王莽擅權卒
移漢祚

漢和帝建和三年七月北地雨肉狀如牛肋或大
如手是時果冀專權枉殺李固杜喬天下冤之梁
氏尋亦誅滅

晉惠帝永康元年三月尉氏雨血是歲正月送愍
哀太子出於許宮於是王室成釁禍流天下

晉愍帝建興元年河南雨血肉是時五胡并起天

天下大亂

後齊河清元年太原雨血明年周師入并州大戰
伏屍百餘里

漢武帝太始八年蜀地雨白毛時益州刺史皇甫
晏伐汶山胡牙門將張和因眾怨誣晏反誅之

隋文帝開皇六年京師雨毛如髮長者三尺餘短
者六七寸是年閩中米貴

天雨爵錫為饑荒不出三年改易王者爵錫如甘露

着樹白者甘露黃者爵錫

天兩赤雪有大兵起大戰亡國

天兩如水銀是謂刑祖不出三年兵喪并起亡國失

地失道之君當之

隋文帝仁壽二年仁壽宮再兩水銀其後卒以亂亡

天兩金鉄是謂刑法有餘人君殘酷賊殺不辜不出

一年兵起於朝

天兩金銀鉄花兵將興失道之君當之

秦獻公十八年兩金櫟陽二十一年與三晉戰于

石門斬首六萬尚首功自此始

隋文帝仁壽四年諸州造舍利塔陝州兩金銀花

人以為佛家之祥未幾而漢王諒反煬帝失道二

世而亡

天兩錢其國大饑有兵亂或兩於人家有大殃

天兩絲綿天下有兵喪不出六年大亂

天兩絮兵起國將喪無後

天失雨績狀如麻苧脆若地毛大饑人流有積屍
天雨布帛兵喪并起人流無所

天雨墨注下有陰謀一曰君無道奸臣得志不出五
年國亡

天雨如杵曰其國饑

天雨如釜觀歲大豐稔其形如小錢許大或從地中
出其中有如小麻黍粟大世人謂之蒸餅豐稔之
徵也

天雨笠國大饑

天雨戟不出三年兵起

凡言天雨器物皆其形狀非真此物也曾見上雨落
地皆成墨水麥遭之皆腐此即所謂雨墨者

天雨五穀是謂禾不熟人君賦歛重數故天示戒不
出五年國乏軍糧京房曰天雨五穀是謂惡祥不
出一年人民流亡又曰國君專祿失信去賢用佞
天民無所向則天雨五穀

天雨粟不肖者食祿三公易位

天雨黍為政者去大人出走他國有死將

天雨草木其歲人多病死墨子曰國君失信專祿去

賢則天雨草易飛侯曰天雨草國有殃民流亡

天雨木君臣不和讒人進用其歲多風五穀傷民多

饑一曰人多病死

天雨花國有喪

天雨孽國君有咎

漢平帝元始元年正月天雨草其葉相糾結大如

彈丸永光二年亦有此自是而漢祚衰矣

天雨冰水失其性有大疫

天雨木冰上陽弛不下通下陰弛不上達故雨而木

為之冰劉向曰水陰之盛而冰滯木者少陽貴臣

卿大夫之象陰氣脅木木先寒故得雨即冰其占

為大臣死或謂之木介介者披甲之兆也

漢安帝時京師雨冰是歲梁后崩大將軍梁冀誅

天火異占

天下火焚燒是謂大殃民人逃亡莫知其鄉

天火燒國郭門其地有謀議將反

天火燒城門其國圍

天火燒宗廟社稷其國將亡

天火燒民舍大兵方起

天火燒山阜民不安其居

天火燒野五穀國將亡

天火燒大木奸兵起六月降霜

天火燒牛馬其邑有兵屠城

天下火音如雷鼓臣下有謀國君凶

李淳風曰按漢魏時造作宮室過度而頻有天災
其後尋有兵亂隋末大業十二年東京災西京災
顯陽門至十三年二邑並圍沒即絕其宗社亦天
告之驗也

觀象玩占卷之二

日摠叙

日者衆陽之宗人君之象光明外發精體內全匿精
 揚輝圓而常滿人君之體也晝夜有節循環有度
 春生夏長秋收冬藏人君之政也星月稟其光辰
 宿宣其氣生靈仰其照葵藿慕其恩人君之德也
 故日主道德養生福祐仁恩人君有瑕必露其匿
 以告示焉日行於天一晝一夜行一度日出地上

謂之晝日沒地下謂之夜一晝一夜謂之一日積
三百六十五日有奇而周天謂之一歲日實也言
光明盛實也日之先後不可名狀假甲子乙丑以
異之其行乎天去極近而日長為暑去極遠而日
短為寒去二極中而晝夜均暄涼等時此其大概
未能盡其微妙故聖人作曆以推步焉序之以四
時分之以八卦正之以中氣變之以節侯為二十
四氣其詳著之曆法茲不能載也天文志曰日行
有道之國其色光明人主吉昌百姓安享其君無
道其臣亂國則日為失色不明日食者陰侵陽臣
掩君也有亡國有死君有大水日食見星臣奪其
君天下紛爭故日有變人君必修德以禱之

日變異占

日變色其占有軍軍破無軍喪侯王

日青無光其下有死王一曰人主失勢京房曰日青
色君弱一曰日變色為憂為饑又曰日有青光不

出二旬大風糴倍貴十見以上民多疾疫不出一
年一曰日蒼色臣不忠黨仲舒曰日青無光民相
食主去

日色變赤有兵爭京房曰人君不德民背上則日赤
一曰日赤諸侯恣日出無光所臨之國不昌董仲
舒曰天下大旱兵起

日色如楮兵車滿野一曰將死於野

日赤如火君喪臣叛其國乃亂咸精符曰日赤如炭

主以急見伐 日初出赤如火景照地赤其所宿
國亂亦為有兵流血

日赤如血其下君憂臣叛兵役並起

日色變黃土工興咸精符曰閭刑庶孽謀詐作奸董
仲舒曰日黃無光山崩地動

日黃濁布散人君有妻黨之孽

日有黃光照地其國土工興

日色赤黃有旱亦為火災

日色變白有亡諸侯若兩敵相當則其分軍敗其將
死咸精符曰日色變白有臣下奸謀四夷動京房
曰上微弱無法制則日白萬物無霜而死又曰臣
無勇志天子自將兵征伐則日白體動而寒一曰
日白為早為喪日有白氣國主憂喪

日白無光董仲舒曰其國主憂不死亦不昌

日色變黑天子臨危命在四方一曰天下大水民多
死京房曰君惡見於百姓而臣不為掩也其占為

主令不行

日有黑光多風兵不出六十日有大水傷五穀其所

見之國糴貴十倍 日黑無光董仲舒曰臣下為政

日色變紫咸精符曰夷狄內侵兵將用則日紫

日色變黃濁黑光動搖為風雨不動搖為憂病不則

國有暴令

日色變赤赤白各滿十日臣伏兵謀君甘氏曰日

或黑或青或白或黃師主亡破軍

凡日和則五色明照四方黃白為失信青赤奪明黑
多暴害

日光四散赤如流血所照皆赤為急兵有流血一曰
賊入營

日景如虹其國亂

日無光五穀不成盜賊併起太公兵法曰君不明臣
不忠則日無光咸精符曰日無光主勢奪讒臣蔽
行又曰妻黨群翔臣恣橫則日黃無光大臣擅權

則日青無光子黨犯命權威宮國則游氣蔽日日
出鬱快無色日光亡諸侯叛羣禍起乙巳占曰出

一竿無光耀者其月有王死或有憂或人君宰臣
不順四時不順刑罰不當大臣奸謀離賢蔽能則
日無光而見瑕譎不改其行則其國五穀不成六
畜不生人民縱橫盜賊併起又曰日無光主病一
曰主有負於臣百姓多怨又曰日失色所臨之國
不昌又曰日光明盛萬物不得視其體猶人君至

尊不可窺覩今日無光人皆見其體貌將有伺察
神器者矣

日出於東方二竿亭亭無光曰日病未入西方二竿
亭亭無光曰日死日病其地分侯王病日死其地
分侯王死天文論曰日病主病日黃色無光是也
日死主死朔曰日紫色是也以日所宿分及日辰
占其國一曰日始出二竿未入二竿色赤無光其
分在所有兵喪在春時則為旱災六月至中無光

人君不明一曰天下有五王

日久無光天子蔽塞臣擅權國將易

日暗無光天雲盡赤三十日有兵君亡五十日兵大

起人流亡九十日社稷亡一百二十日其國為虛

日青赤無光或黑綠或如灰色旬望以上荆州占曰

在正月臣凌君天子憂二月四夷來侵三月來年

彗星出後一百二十日名山崩四月天子殺大臣

一曰強臣謀主五月南夷為亂後九十日地動山

崩中國函六月來年天鳴地動下逆上七月山崩
水溢應在冲八月有謀殺主者後一百二十日地
震九月天子凶來年大蝗夏水灾十月人主失國
地行人少十一月後九十日天雨楮塵來年十一
月柱使出天下兵起十二月大臣凌君四夷來侵
應在九十日

日無雲不見光比三日有大喪有滅國

日晝昏臣叛君甘氏曰日無雲而晝昏為烏群鳴國

失政臣執柄春秋緯氏曰后族亂政則日晝昏京

房曰奸臣盛則日晝昧乙巳占曰日昏行人無影

至暮不止者上行急下不聊生不出一年大水下

田荒

陰雲沈濛日晝昏不見其光者此為陰謀占曰日濛
濛無光士卒內亂

漢元帝永光元年四月日色青白亡景正中時有
景無光是夏寒至九月日乃有光京房易傳曰美

不與人茲謂上弱厥異日白七日不溫順亡所至
茲謂弱日白六十日物無霜而死天子親伐茲謂
不知日白體動而寒弱而有任茲謂不亡日白不
溫明不動辟况言公行茲謂不伸厥異日黑大風
起天無雲日光掩不難上改茲謂見過日黑居灰
大如彈丸時帝優游不斷官官弄權卒亡漢祚

成帝和平元年正月壬寅朔日月俱在營室時日
出赤二月癸未日朝赤且入又赤夜月赤甲申日

出赤如血亡光漏上四刻半乃頗有光燭地黃食
後乃復京房易傳曰辟不聞道茲謂不厥異日赤
三月乙未日赤黃有黑氣大如錢居日中央京房

易傳曰祭天不順茲謂逆厥異日赤其中黑聞善
不行茲謂失知厥異日黃夫大人者與天地合其
德與日月合其明故聖王在上摠命羣賢以亮天
功則日之光明五色備其燭耀亡主有則為異應
行而變色也不虛改形不虛毀觀日之五變足以

監矣是時內有趙后之寵外有王氏之專漢祚將移之兆也

靈帝時日數出東方赤如血無光高二丈餘乃有影且入西方去地二丈餘亦如之京房占曰國有讒臣朝有佞殘則日冥無光又曰日朝夕無光社稷將亡是時帝信宦豎大殺忠良遂亡漢室

晉懷帝永嘉元年十一月乙亥黃黑氣掩日所照皆黃五年庚申日散如血流光照皆赤是時天下

大亂帝卒於虜廷明帝太寧元年正月己卯日暈無光癸巳黃霧四塞占曰君道失明陰陽昏臣有陰謀京房曰下專刑之德教既凌上卒伏其辜

隋文帝仁壽四年七月乙未日青無光八日乃復占曰主勢奪又曰日無光有死王丁未土崩漢王諒及楊素討平之

煬帝大業十三年十一月辛酉日光四散如流血占曰賊入宮主以急兵見伐又曰臣逆君明年三

月宇文化及等弑帝諸王及幸臣併被殺

唐太宗貞觀二十三年三月日赤無光李淳風曰

日變色有軍急又曰其君無德其臣亂國濮陽復

曰日無光主病

日已入而有餘光赤黃倒映名曰反照其地有叛兵

日中有火光氣色見其國君左右大臣有反者

日生彗五色君大福天下大穰

日上芒如舉火君大昌

日上有黃芒得黃色君有福不得黃色得青色死色

君有憂乙巳占曰日上出黃芒天下攻戰

日垂芒有戰

日生芒員大主人兵不利臣謀主不出三日

日有四角不出二年兵饑

日有六角大亂兵起

日有白足甘氏曰有破國石氏曰有敗軍死將乙巳

占曰白足者日影屬地色純白也

日赤足主廢臣相伐

日始出有赤足主受伐臣反輔相奪或曰日赤色有
舉兵白髮有殺諸侯

日兩足庶雄起却萌曰日生齒足者有反兵

日中烏見主不明政亂其國有白衣會有大旱一曰
王者憂之一曰旌旂動將軍出若出軍過之兵敗
將死

日中烏出在外天下大國受殃哭聲沸天

晉穆帝永和八年張重華在涼州中暴赤如火中
有三足烏見五日乃止是時江左建國胡夷竊據
中華涼州中陷穆帝幼弱不親國政卒以衰微

陳文帝天嘉七年三月庚午日無光烏見占曰王
者惡之其日庚午吳楚之分四月甲子日有交暈
白虹貫日癸酉帝崩

日戴光天下有大殃不出三年

日中有黑子京房曰天下不順其主厥異日中有黑

子黑氣一曰臣有蔽主明者一曰日有黑子黑雲
若青若赤若黃乍二乍三皆為天子惡之

日中有若飛燕者其下有廢王

日中有如人立者君慎左右

日中有如人行者臣叛主或曰兩主併立

青氣入日狀如兩鳥重立日昏無光夷狄入主中國

日中有如人黑幘黑衣仗刀而立人主失位

日無光中有物或赤或黃或黑大如爪跳躍世主命

絕

漢靈帝中平四年三月丙申黑氣大如爪在日中

五年正月日色赤黃有黑氣如飛鵲數月乃銷是

時帝信用宦者禁錮忠良遂亡漢祚

晉惠帝元康九年正月日中有若飛燕數日乃銷

王隱以為愍懷廢死之徵

惠帝永寧元年九月甲申日中有黑子京房曰黑
者陰也臣不掩君惡令下見百姓惡君則有此變

大安元年十一月日中有黑氣分日是時內亂權諸王迭起骨肉相殘天下大亂自此始也

穆帝永和十一年三月戊申日中有黑子大如桃

二枚時天子幼弱久不親國政時黑子屢見至升

平三年十月丙午日中有黑子如雞卵俄而帝崩

太元二十年十一月辛卯日中又有黑子是時會

稽王以母弟干政

晉太和四年十月乙未日中有黑子如李至八年

十一月巳酉天子廢為海西公

日消小所當國君死

日中分其國亡一曰天下分或曰日分為二有從主

叛民一曰日裂君死臣爭荊州占曰所舍國亡又

曰日中分為二國主死中分而有為君其中爭主

死

日輪缺有萬人死其實不利先起者

日夜出是謂陰明天下大兵洪水流行一曰君不祥

社稷亡却萌曰日夜出有國者亡兵起天下饑以
日辰命國乙巳占曰有物如日非真日也

晉元帝大興元年十一月乙卯日夜出高三丈有
青黑珥是時群胡交亂中原叛蕩晉之所有江南
而已而帝又迫於強臣主威不振含垢忍辱卒以

憂崩

日再出再沒國亡君死主降於臣天下亡日下而却
上國大亂

日日出非其所政令不行天子失國

日隕於地天下分裂天子國亡

晉愍帝建興二年正月辛未寅時日隕于地又有
三日相承出於西方而東行五年正月庚子三日
並照虹蜺彌天丁巳亦如其數是時帝再蒙塵天
下分裂

兩日併出諸侯有謀是謂滅亡天下用兵無道者亡
京房曰無道之臣舉兵而亡又曰兩日出天下爭

王視其所在之方先滅者亡乙巳占曰兩日併照
是謂爭明假主抗衡兩王並爭武容占曰兩日出
兩主立地陷有大水分裂各設法令所行不一兩
軍相當有數日並出其下有拔城大戰宜分營以
應之凡眾日并出非真日也有物如日也月亦同
日閉離而復合有象日之氣來相冲擊或白或赤或
青或黑或綠或五色如珥狀成行隊而相陵突皆
為大兵大旱天下大亂天子失國不出三年一曰
日閉者為出復入也有軍在外其下有大戰拔城
無軍兵起國亡

日光相盪天下易主春秋緯氏曰赤日相盪流血滂
汜君臣無道行縱橫

晋元帝大興四年二月癸亥日閉明年王敦反武
昌又明年帝崩

日無雲而至暮不出天下大亂天子國亡

日薄凡日食皆在朔非朔而食謂之薄不因日月同

宿而別為陰氣所掩兵占為死君為亡國其定甚
于晦朔之食

晉惠帝永康元年正月癸亥朔大赦改元至十七
日巳卯日食其明年趙王倫篡位晉國遂亡夷狄
爭雄天下大亂甘氏曰朔晦之日日色赤黃無光
為薄日其月早或曰薄日者日月交道遠不當日
忽于朔望無光青黑色震動如火照地皆黃是也
其占為災在國君乙巳占曰非朔而食謂之薄日

人君失道賊臣窺伺叛兵將起陰氣盛而掩薄日
光也陰侵陽臣凌君其分君凶不出三年兵喪並
作家國壞亡

日蝕占

李淳風曰日依常度食者月來掩之也臣下蔽君之
象人君當防權臣內戚在左右者其食雖依常度
而災害在于國君大臣人或疑之以為日月虧食
可算食分多少早晚起復莫不先期知之此豈天

災之意耶夫月毀于天而魚腦滅於泉陰陽之氣迭相感應自然之理東風至而酒湛溢東風非故為酒未也風至而酒自溢象見于天而災自應于下理固然也有道之君脩德而無咎暴亂之主傲虐而成災譬之陽燧取火方諸取水以他鏡求之而不得感召之理信不誣矣

日食必有亡國死君之災食者如蠶食葉之狀陰侵陽下陵上婦乘夫臣亂君之象也日食則失道之

國亡乙巳占曰凡日食為有喪有兵失地亡國皆以食時早晚宿分日辰占之

日食從上起主失道而亡一曰子為害京房曰君之接人而妄用之以亡社稷却萌曰日食上責在主色青則弱于任善色赤無禮色黃掩臣善欺其下色白弱于誅惡色黑失禮于鬼神日食從旁起內亂兵火起更立天子一曰臣與君爭美一曰黎庶為亂兵從其方起從左起多人災從右起君政

暴天鏡占曰從右食淫女貴人君暴治丘冢害人
動怒咸精符曰日從旁食臣謀亂

日食從下起女主自恣臣下興師動眾失律將軍當
之一曰君失民下人為寇却萌曰日食從下起色
青民相譖有疾疫虫灾赤則眾庶上僭強陵弱有
旱灾黃則宮室沃侈土工繁興白則民相賊害有
小兵黑則百姓多惡有水灾

日食從中起內有伏謀色赤事成色青中止色黃受
誅色白事覺色黑逆誅一曰日食從中內亂兵起
更立太子日色內青赤而外黃國亡荆州占曰日
食從中起人君妻其同姓國受兵君遇賊又曰日
食中央室主死

日食少火諸侯大臣亡國失地相逐

日食半有大喪亡國 日食過半天下之主當其灾
日食不盡強國失地一曰相出走

日食盡君死天下亡夷狄入制中國

日食見星臣弑其君天下分裂一曰有亡國易姓

日食東方東方之國灾日食西方西方之國灾南北

亦如之

日入地而食大人當之

日從地下食出而虧當有大兵視其虧處以占兵起

之方

日始出而食是謂氣光齊越之國受兵亡地

日中而食甘氏曰荆魏受兵亡地海內兵皆起

日晡而食兵將罷

日將入而食大人出兵燕趙當之武家占曰日出至

食時蝕宋鄭當之食時至禺中楚當之禺中至日

映秦當之日映至晡時魏當之晡時日入燕當之

日入至人定代當之皆為不出三年有喪

日食而有氣如虹在日上者近臣犯上甘氏曰

近臣謀上

日食而暈旁有珥白雲來去掩映天下大亂兵大起

臣弑君君失位

日食而旁有似白兔白鹿守之者民為亂臣逆君不出其年其分兵起京房曰日食而有如白兔守之君不用賢澤不下施則高為下下為高發如冲

日食而有雲如虎守之大臣謀君不出三月遠不過三年石氏曰人君九族有伏謀君政以自成者

日食而有雲氣風冥暈珥似有群鳥守日名曰天雞后妃外戚謀易主位數視動靜欲行其志

日食有雲如坐人於上者君安居下者臣安

日食從旁有雲繞圍之者臣下無君

日食且有日暈貫日中兩軍爭後起勝

日食有交暈貫日中兩軍爭後起勝

日食有四珥從上而下天下兵起從下而上天子有大喪

日食有珥有雲冲之甲乙日白雲天下大兵丙丁日

黑雲天下大水戊己日青雲天下人主死喪庚辛

日赤雲兵大作天下有繫壬癸日黃雲土工興

天子憂

日食而大風地鳴四方有雲宰相專權謀反

日將食而地震裂日色昧而寒乃食者方伯專權恣行殺害君不能制

日食而風起地動大臣專制諸侯不臣有亡君

日食而大寒且在平旦中國大饑賊起四夷為亂諸

侯反逆一曰日食而寒夷狄兵動日食已而寒天下饑盜賊起

日食而有星墜復上賦歎煩數百姓屈勞君弑國亡

日食而雷國亡

日食而烏出見天下有大喪

不出三年

日食而陰冥臣蔽主

日食而大風起亂從中起

日四時以王日食人主凶以相日食國相死以囚死

日食臣陵君以休廢日食民多疾疫京房曰日食

王為君相為臣因為罪人死為夷狄休為民有兵

從食所未在三年之內且有天災

日四時食占

春食甘氏曰有女喪乙巳占曰年大凶有喪女主亡

夏食甘氏曰諸侯多死一曰蕪年

秋食甘氏曰有兵乙巳占曰有兵戰主死

冬食甘氏曰多死喪乙巳占曰日食春丙丁夏庚辛

秋壬癸冬甲乙皆為相死又曰春庚辛夏壬癸秋

丙丁冬戊己皆為殺逆是謂禍其國也

觀象玩占卷之三

日蝕十二月占

正月日食京房曰大臣死不死則黜黃帝占曰大臣

走乙巳占曰人多病陳卓曰五穀貴齊大凶武審

曰內兵起人流亡

二月日食人主夫人死亦為大旱石氏曰人多死陳

卓曰豆貴牛死魯大凶

三月日食黃帝占曰有反者石氏曰水大出陳卓曰

絲綿布帛貴楚大凶武審曰有旱饑

四月日食人主有過臣有憂石氏曰天下大旱陳卓
曰牛無食六畜死宋大凶京房曰大臣憂武審曰
旱疫

五月日食諸侯多死乙巳占曰大旱民饑陳卓曰牛
死六畜貴梁大凶武審曰兵起東北

六月日食京房曰人主有謀其下國分土一曰外國
侵其分失土石氏曰六畜貴陳卓曰五穀貴沛大

凶武審曰大臣死

七月日食黃帝占曰有反者從內起乙巳占曰歲惡
秦國惡之陳卓曰綿帛貴陳大凶武審曰兵起人
流亡京房曰大水壞城郭

八月日食京房曰天下更始期三年石氏曰兵大起
陳卓曰兵甲貴鄭大凶武審曰兵饑

九月日食京房曰外人欲自立不成石氏曰布帛貴
陳卓曰鹽貴韓大凶武審曰饑疫陵君君走

十月日食黃帝占曰奸臣在朝二人親一人遠陵君
君走石氏曰六畜魚鹽貴秦大凶武密曰冬旱

十一月日食王者亡地臣子為逆石氏曰魚鹽貴陳

卓曰燕大凶乙巳占曰糴貴牛死武密曰人畜俱疫

十二月日食其下有兵黃帝占曰大臣欲自立不成

夫人謀君石氏曰穀貴牛死陳卓曰薄貴趙大凶

武密曰水災夏麥凶

日蝕十干十二支占

史記天官書曰日食為不臧食以甲乙四海之外不

占食以丙丁江淮海岱也戊己中州河濟也庚辛

華山以西壬癸恒山以北其下君當之以日支論

武密占曰日食子日兵起丑寅卯日皆旱辰兵巳

火災午未水申酉皆為兵戌草傷亥小人用事

凡日食兩敵相當即從食所擊之大勝殺將

日食復生者日光復也我軍君其地擊敵必勝

日不可食出軍日方食而出軍其軍必敗當害氣也

日食三虧三復者相侵陵也有兵從而食方擊之勝
假令食東東擊之勝

日食六十甲子占 京房曰潛潭巴占有異同
今合之其不同者以一曰別之

甲子日北夷有謀否則大水在東方一曰夷兵起

乙丑日諸侯之臣殺其君在西北兵行不勝後

有小兵五穀虫傷一曰大旱 丙寅日司徒欲謀

有小旱在東南一曰有旱蝗 丁卯日諸侯欲謀

其君有小旱在東南有蝗一曰兵起 戊辰日有

同姓近臣欲謀君有地動於東南 己巳日姻家

謀君諸侯起兵在西南一曰有火災 庚午日司

徒謀君有大旱在南方一曰有兵火 辛未日司

室欲謀君有虫在東方一曰水潦 壬申日諸侯

相殺在東北後有小兵盜賊併行 癸酉日上強

天下謀兵不出其年大兵行始於西方淫雨數降

甲戌日近臣謀君事覺而戮有小旱在西南一

曰草木不滋王命不行 乙亥日子欲為逆而身

受戮有陰雨天下亂 一曰冬無凍冰東國發兵

丙子日諸侯相殺共行在東方後有大水 一曰夏

霜為災 丁丑日諸侯近臣謀其君在西北方後

有小兵 一曰三公有憂 戊寅日諸侯近臣謀君

歲旱土沸 一曰大風 己卯日東夷謀殺其君有

虫 一曰多盜 庚辰日君易賢以剛卒以自傷後

有水在東北 一曰有兵旱 辛巳日諸侯外親謀

其君兵行在西北 一曰後宮有謀 壬午日三公

與諸侯相賊弱其君王三公失國後有旱且水 一

曰久雨 癸未日僭上侵下臣謀君在東有小虫

一曰仁義不行 甲申日司馬謀逆有小水在晉

一曰四月兩霜 乙酉日君弱臣強司馬將兵征

其主 一曰賢人遠退 丙戌日同姓近臣不臣後

有大旱火從天墜 一曰訟多寃者 丁亥日君臣

無別司馬牧民司徒將兵有虫在西北方 一曰有

匿謀 戊子日妻欲害夫九族夷滅後有大水在
東方一曰宮中有憂 己丑日姻家有謀有小兵
在西方一曰下民憂 庚寅日有謀反者敗殺有
小旱在東南一曰將相灾骨肉相賊且有水 辛
卯日天子微弱諸謀君反受其殃有虫在東方一
曰臣代主 壬辰日諸侯有謀逆後大水在東方
一曰河水決 癸巳日諸侯相代一曰權不一
甲午日南夷弑君後有大旱一曰虫灾 乙未日

君責眾庶虐民背叛有地動 丙申日君暴亡臣
橫恣上下相賊有大水一曰諸侯叛亂夷狄内侵
歲旱 丁酉日諸侯之臣謀其君事敗後有大兵
起西北方一曰侯王侵 戊戌日姻家謀逆有旱
馬騶運一曰后妃憂 己亥日主弱小人執政
庚子日庶子謀嫡不成後有大水一曰天子疑
辛丑日賢人疑小人勝人主危一曰君疑臣三公
有免黜者 壬寅日諸侯謀逆以亡其國有小旱

在東南一曰大臣驕恣天下苦兵 癸卯日諸侯

不順天下有亡國有虫一曰外國伐主 甲辰日

王后爵命絕有水 乙巳日諸侯上侵以日益近

臣盜竊以為積人主不知一曰東國兵起 丙午

日親戚爭嗣同姓有謀大旱在南方一曰民多流

亡 丁未日司徒不道執政有謀有虫有地震一

曰王者憂 戊申日臣謀君後有小水一曰地動

諸侯爭 己酉日西夷弑君有大兵西行 庚戌

日司馬之臣謀逆有小旱一曰臣下相侵 辛亥

日有虫司馬之臣謀逆自敗一曰近臣有憂 壬

子日同姓諸侯任政者不臣一曰女主憂後宮有

謀 癸丑日寇盜行兵君主不明水潦為敗 甲

寅日同姓大臣有謀有旱親戚相賊為叛 乙卯

日權臣專政不出三年誅有虫一曰雷不行霜不

殺奸人入君宮 丙辰日帝命之極武王乃德一

曰山水大出 丁巳日天乃去惡依聖人有小兵

一曰其下有聚兵 戊午日姻家執政賊由妻始

後有大旱 己未日臣不安居群陰謀侵地大動

一曰其王失土 庚申骨月相殘有水一曰夷狄

內侵 辛酉日昆弟相殺更有國家後有兵三年

不息一曰奸邪欲起妃謀主 壬戌日諸侯謀叛

在西南一曰小人用事 癸亥日天下命終聖人

更起有大雨水一曰王者憂之

日食春甲夏丙日四季戊日秋庚冬壬日皆為天子

惡之春乙夏丁日四季己日秋辛冬癸日皆為王

后惡之

晦日日食大臣執權一曰臣專主命

日月俱食有亡國月先食陰國當之日先食陽國當

之食陽君凶食陰女主凶

漢高帝三年二月甲戌日食在斗二十度占曰燕

地也後二年燕反誅滅復立盧綰為燕王後又以

反敗

惠帝七年正月辛丑朔日食在危十三度占曰正月朔日是為三朝尊者惡之五月丁卯先晦一日食幾盡在七星初占曰五月微陰始起而犯至陽其占重至八月宮車晏駕而有呂氏詐置嗣君之害京房易傳曰日食不以晦朔者名曰薄人君誅罰不以理或賊臣將起日月雖不同宿陰氣盛薄日光也

高后七年正月己丑晦日食在室九度為宮室中
高后惡之曰此為我也明年而后崩

武帝建元二年二月丙戌朔日食在奎十四度劉向曰奎為卑賤婦人其後衛太后自至微興卒有不終之咎

元狩元年五月乙巳晦日食在柳六度京房推以為是時日從旁右始法曰君失臣明年丞相弘卒凡日食從旁左右起皆為君失臣從上起臣失君從下起君失民

昭帝始元三年十一月壬辰朔日食在斗九度占
曰燕地也後四年燕刺王反誅

元鳳元年七月己亥晦日食幾盡在張十二度劉
向以為己亥為既其占重後六年宮車晏駕卒以
無嗣益康曰己丑亥水純陰故其日食為最重也
成帝建始三年十二月戊申朔日有食之其夜未
央殿中地震谷永對曰日食在女九度占在皇后
地震蕭牆之內咎在貴妾二者俱發明同事異人

共掩制陽將害繼嗣也但日食則妾不見地震則
后不見異日而發則以誅事是后與妾俱有失節
之尤故天因此兩見其變若曰違失婦道隔遠眾
妾妨絕繼嗣者此二人也杜欽曰日以戊申食時
加未戌土中宮之部也此必嫡妾爭寵而為患也
哀帝元壽元年正月辛丑朔日食不盡如鉤至營
室十度與惠帝七年同日月鮑宣上言今日食于
三始誠可畏懼小民正月朔日尚恐毀敗器物况

日虧乎

光武三年五月乙卯晦日食在柳十四度占曰日食乙卯奸人入宮柳為京師分野時世祖在淮楊赤眉降賊樊崇作亂事覺伏誅七年三月癸亥晦日食在畢五度畢為邊兵其秋隗囂侵安定冬盧芳所置朔方雲中太守各舉部降十六年三月辛丑晦日食在昴七度占曰日食辛丑主有疑獄昴為獄事時諸郡太守生度田不實帝怒殺十餘人後

深悔之十七年二月乙未晦日食在胃九度占曰日食乙未君責暴眾庶眾爵胃土主倉廩時諸郡新坐租之後天下惶怖以穀為憂胃又為供食之官其十月廢耶皇后詔曰不可以奉供養二十五

年三月戊申晦日食在畢十五度占曰為邊兵又曰日食戊申主兵弱諸侯爭兵其冬十月武漢雲夷為寇命伏波將軍將兵伐之二十九年二月丁巳朔日食在東壁壁為文章又為取訾之星先是

皇子諸王各招採文章談說之士去年中有人上
奏諸王所招待賓客真偽交雜多受刑罰者上怒
詔捕諸王客皆被以苛法死者甚多三十一年五
月癸酉朔日食在柳五度柳京師宿也又為喪車
後二年宮車晏駕

中元元年十一月甲子晦日食在斗二十八度占
曰斗為廟主爵祿十一月甲子時王日也斗牛為
星紀其占重明年帝崩

明帝永平三年八月壬申晦日食在氐三度氐為
宿宮是時帝作北宮八年十月壬寅晦日食既在南
斗十一度占曰斗吳也後二年廣陵王荆反自殺
廣陵吳分也十六年五月戊午晦日食在斗十五
度占曰五月戊午時王日也猶十一月甲子也又
在柳為京師後二年明帝崩

章帝建初五年二月庚辰朔日食在壁八度是時
群臣爭競多相作毀者

和帝永元四年六月戊戌朔日食在七星二度占
曰七星主衣裳又曰行近軒轅左角為太后族是
月十九日上免太后兄弟竇德等遣就國選嚴能
相於國迫令自殺十二月秋七月辛亥朔日食在
翼八度翼荊州宿也明年冬南郡蠻夷反為寇

安帝永初五年正月庚辰朔日食在虛八度占曰
正月朔王者統事之日也虛空名也是時鄧太后
攝政不得行事蠻夷並起為寇西邊諸郡皆空虛

元初元年十月戊子朔日食在尾十度尾為後宮
繼嗣之室也是時上甚幸閭貴人明年四月立之
為后其後卒諡太子廢之六年十二月戊午朔日
食既盡如昏在女十一度占曰女王惡之後二年
太后崩

桓帝元嘉二年七月庚辰日食在翼四度占曰日
食庚辰君易賢以剛卒以自傷翼又主娼樂時帝
信任宦官殺戮忠良以傾漢室帝又好音樂聞琴

而太息曰善乎哉為琴若此一而足矣

延興二年九月丁卯朔日食在角五度角鄭宿也

十一月泰山盜賊群起劫殺長吏泰山於天文屬

鄭

永興八年正月丙申晦日食在營室十三度占曰
女主惡之其年二月癸亥鄧皇后坐殿上送暴室

令自殺

永康元年五月壬子晦日食在鬼一度占曰壬子
純水之日陽不克將有水害其八月六州大水渤

海盜起

靈帝熹平二年十二月癸酉晦日食在虛二度是
時中常侍曹節王甫專政帝為虛位矣

光和元年十月丙子晦日食在箕四度箕為后宮
又主口舌是月上聽謬廢郭后

魏莊帝永康二年十月己酉朔日在地下食出而
虧從西南角起占曰西夷反後有大兵西行三年
三月永州刺史爾朱萬俟醜奴蕭寶寅於安定送

京師斬之

日月星並見占

日月並照中國有西主立一曰后妃專政有弑逆夷狄內侵天下兵起京房曰日月並照是謂並明兩主爭立又曰君臣爭明兵起國亡天下大饑荊州占曰天下有國者亡

日月並明相去數寸若一寸臣滅主一曰君為臣臣為君民相殘又曰強國弱小國強歲大凶

日月並晝見明兵起臣叛

日月並夜見明天下大亂分裂

日八月中不出九十日大兵起易法金銖貴三倍人主死朔日日色紫赤是也

日月與大星並見是謂爭明大國分裂小國強天下有立王若星月有光而日無光則大國亡

日當午有星在日下妃妾謀弑其君

慧星見日旁子弑父臣弑君天下大兵

日當午四星環之侯王奪主國五星環之太子為不利二星夾日下人謀上奸臣在內后宮閹臣謀反左右夾日者將軍與內臣合謀合又曰天子不能禁制臣下則星與日並出是謂內弱外強

妖星與日並出名曰婦女星與日爭光夫弱婦強女子為王其在邑在野為喪為兵

日中有星天下有賊星多者賊多也孝經內紀曰一星在月中臣與君婦女共行奸星在月星臣與黃

門童女陰奸為賊

兩星在月角君與臣同作奸一星在月下后宮女子要臣為奸

月兩角各有一星有軍在外者敗洛書甄曜度日月右角有星奸臣在東宮中月上有星奸臣在南宮中月下有星奸臣在後宮中月兩角俱有星為奸者敗河圖曰星出月陰負海國勝出月下光相接其國君死人饑

大星與月同光臣強一曰大臣爭競與主爭明

觀象玩占卷之四

月總叙

月者大陰之精積而成象魄質含影稟日之光以明
照夜以之配日女之象以之比德刑法之義列之
朝廷諸侯大臣之類故近日則光斂猶臣近君卑
而屈也遠而則光滿為其守道猶法蒙君榮華而
體勢伸也當日則食猶臣僭君道而禍至于覆滅
也盈極必蝕示其不可久盈也行有弦望晦朔遲

疾陰陽政刑之等威也日一日行一度月一日行
十二度一千三百四十分度之四百九十四此平
行之大率也人君有道人臣奉法則月行依度臣
執權則月行失道大臣用事兵刑失理則月行南
乍北女主外戚擅權則月行或進或退此亦其大
略也若夫推求晦朔弦望等術皆著曆法此不勝
載獨取占焉

月變異占

月變色其國有殃青為憂為饑赤為爭為兵白為喪
為旱黑為水疾疫死喪黃潤而明則有喜黃燥風
旱又曰月變色將殃

月始生而色青其分有疾五穀貴色赤其分君憂色
黃其分有立主色白其分亡地色黑其分有水
月滿而色赤有兵旱月赤如赭大將死野兩軍相當
月生而色黃人生受其殃

月二十八日色黃客殃河圖帝覽曰月入而黃主勝

月出而赤黃客勝三日不復主人戰不勝

月無光臣作亂其下國有死王一曰君令不行民饑國憂乙巳占曰人君宰相行令不順四時刑罰不中出賢蔽能則月無光不救其行五穀不成六畜不生上下不從盜賊並起或月無光戰不勝京房曰月無光臣下作亂教令不行民饑國亡

正月月無光兵起人多死 二月月無光國有災變
事 三日月無光水災 四日月無光大旱 五

月月無光火災旱 六日月無光六畜貴 七月

月無光虫災歲凶 八日月無光兵起 九日月

無光布帛貴 十日月無光六畜貴 十一月月

無光魚鹽大貴 十二月月無光五穀大貴

月生而無光其下多死亡

日暈而無光是謂大暈其下有兵喪

凡攻城月小而無光其城降日大而無光城不降

月光如張炬火其下國立王

月晝明奸邪並作君臣爭明女主失行陰國兵強中國饑饉天下謀僭乙巳占曰月晝明臣將與君爭能人君宜黜強臣去奸佞親忠直絕女謁則禍作不生三日其中縵縵如絲布狀其野虛兵盡出在外主人不勝

月出非其所行非其所路皆女主失行奸通內外陰謀小國兵強中國民饑下獄僭權

天有三門房星其準也其中央曰天街南二星間曰陽環其南星之下曰大陽道北二星間曰陰環其北星之上曰大陰道月行由天街則天下和平方行大陽道則為早行大陰道則為水

月出地中庶人出為天下王 月生正偃天下有兵兵合無兵人主凶 一曰無兵則兵出一曰月初生而偃有水

月初生正仰天下有兵兵合無兵人主凶 月始生而南向羅貴在其月有戰則南方勝 一曰月

生而南向陰國亡地又曰南國有兵 月初生小
而形廣大者人災 月初生而已半女主強又曰
陰國利 月初生而見東方天下兵起 月初生
而見南方米貴在其月 月初生而盛明女主持
政 凡月生三日而始見天下兵起十五日始見

國滅

凡大月八日昏中小月七日昏中過度有兵不及度
有喪月三日四日而昏中天下有急兵臣專恣月

五日而昏中兵起在外戰六日而昏中兵起不戰
糴貴乙巳占曰月未當中而中有急兵大戰軍破
將死大臣逼君女主擅權天下亂宗廟易

月十二十三日而昏中有謀上事成

月生八日而上弦天下大安 月生八月而_{日下}不弦攻

人城不勝 月十日而不弦戰不勝將死一月六

日而弦大臣專政不用主命九日而弦以戰主人

勝客不勝

月未當弦而弦兵起一曰月未當弦而弦兵大起未
當下弦而弦臣下多奸 月當弦而不弦國有兵

月十五日而望天下安寧下四日而望主更令河圖

帝覽嬉曰月未當望而望是謂促兵宜攻他人月

當望而不望攻人地者有殃所宿國亡地乙巳占

曰未當望而望為急兵大戰軍破將死大臣執政

逼君將有女主擅權天下亂宗廟易

月望而不滿有兵一曰其分失地 月當盈而不盈

君侵臣有大旱之災未當盈而盈欺君有兵

日生三日至七日而盈兵大起八日以後盈天下亂

十一至十四日盈其分君亡 月上弦復盛明君

無威德臣執權民背其君尊其臣 月未當缺而

缺大臣滅女主黜諸侯世家絕 月當虧而不虧

陰威臣強君奪勢 月當出而不出有陰謀有死

亡天下亂 月未當生而生臣下專恣 月始生

天中下謀上事不成 月前望而西缺後望而東

欽名曰反月臣下不奉法侵奪主勢天下有瀑水
兵起 月入八日北向陰國亡地若不盡八日北
向陰陽國失地

月晦而見西方謂之跳朔而猶見東方謂之朏又謂
之反匿朏則侯王其舒心政緩則陽行遲陰行疾
也反匿則侯王其肅言政急則陽行疾陰行遲也
舒者臣強而專政肅者臣懼而太甚荊州占曰行
疾有急事行不及多留事月大盈君惡之大縮臣

惡之 月再中帝王窮 月出復沒天下亂

月數為三四天下分亂一曰將相伐主若數為二將
相有謀 月分為兩無道之君失天下

月墜於天國有憂大臣亡一曰有道之臣亡

兩月並出相重急兵至一曰兩月並見其下兵起國
亡地陷水湧有亡國一曰大臣爭權一曰后宮寵
妾亂政一曰天下有主立若相去二寸臣滅其主
也乙巳占曰兩月並出天下治兵異姓大臣爭勢

為害王者宜選賢者授之又曰月重出皆為暴兵
殘害天下將有亡天下之象也

數月並出國以亂亡若三四五六月並出天下爭立

為帝一曰諸侯大臣爭起如月之數乙巳占曰三

月併見其分有立諸侯女主有競 月在東有小

月承大月小國毀大國伐之為主凶在西有小月

承大月小國勝大月承小月大國勝

月兩弦中間光盛而眾多或二或三四五六以至十

月天子政在諸侯天下分裂 月閉其下有流血

凡兩月三月以至十月以上皆有物如月非真月也

月中有非常氣色皆為后妃有陰謀事

月中有如人形者有兩主爭客勝

月始生有黑雲貫月名曰繳雲或一或二三四不出

三日有暴雨 月望而月中蟾兔不見者所宿國

大水城陷民流亦為女主宮中不安 月生彗其

國昏亂 月生芒后族擅權天子有憂一曰月垂

芒其國亂 月上有黃芒太后有喜 月生角天

下兵起國受殃 月生四日而有角兩刺如茅狀

其國有執逆事 月上角大主勝下角大賊勝

月生牙蓋女主后妃亂天下兵起皇帝占曰大臣恣

欺其君荊州占曰王者備左右一曰妻妾黜主威

敬一曰女主死一曰群下相殘有刺客

月生足其下君憂河圖徵曰帝失德政不平則月生

足月生赤足臣有得罪者 月生爪人主賞罰不

公偏任小人以起兵亂亦為有刺客在其分荊州

占曰月爪所指其方煩擾有土工事河圖秘徵曰

陪臣擅命群下附和則月舉足垂爪或曰諸侯謀

反則有足爪 月生刺賊臣生中國亦曰其宿國

君防刺客若有兵在外則主將防之 荊州占曰

月一日生刺賊生中國 二日生刺女主有隱疾

三日生刺是謂內傷 四日生刺是謂蔽光

五日生刺有妖言 六日生刺其國亡邑 七日

生刺其地弱 八日生刺其地割有分民 九日

生刺其地饑民以食弱以兵行 十日生刺女子

執政十一日生刺其地有陰死者 十二日生刺

其下國昏亂 十三日生刺是謂始強得地 十

四日生刺不利女君 十五日生刺是謂威強其

下多兵 十六日生刺是謂內弱臣叛其主 十

七日生刺是謂滅法有兵 十八日生刺是謂溫

死 十九日生刺是謂陽衰陰治女子執事 二

十日生刺其分有土工 二十一日生刺千里外

有聚兵 二十二日生刺是謂始衰貴人多死

二十三日生刺中有大謀 二十四日生刺中有

大謀 二十五日生刺是謂陰隱國有殃 二十

六日生刺多憂 二十七日生刺大饑 二十八

日生刺有攻城 二十九日生刺是謂自伐其國

有內亂

常以月十四日夜候月中有氣如飛鳥其地居者占

月中有黑子氣大如桃李臣有蔽主明者

漢成帝建始元年八月戊午晨漏未盡三刻有兩月重見易傳曰婦貞厲月幾望君子征凶言君弱而婦強為陰所乘月並出是時帝寵趙氏政歸外戚漢祚遂亡

晉安帝隆安五年三月甲子日生齒占有賊臣桓玄篡位之徵也

簡文帝太寶元年正月丙寅月晝明見於東方占曰有隱謀國雄逃又曰奸盜邪並作擅君之朝其後侯景篡殺

隋煬帝大業九年正月二十七日有兩月見於東方相去二尺許在箕斗之間俄而楊玄感起兵黎陽朱燮管崇殘賊江南天下自此大兵交作兵賊相掠國遂滅亡

月薄女主憂大臣失所天文志曰凡軍行而遇日月薄宜收軍不爾有謀反無交而食曰薄或近望陰

氣侵迫赤黃無光者慙氣薄月也

月無雲而減影昏暗謂之夜冥人君昏耗不明之象
法令不行將有死亡之兆若雜以殺氣寒慘者
有大咎三日內有雨則有不占

月蝕占

月蝕者陽侵陰臣下有咎董仲舒曰臣行刑執法不
中怨氣所積則月之為食月食之宿其國貴人死
或曰月食則粟貴荊州占曰月食則失刑之國當

其咎又曰月食人主宜嚴號令者刑罰食後三日

內有大雨則災解乙巳占曰凡月食其御有拔邑

大戰凡師出門而月食當其國之野軍火敗

將死

月食盡君有殃食不盡臣當之

月食中分不出五年國有兵憂乙巳占曰月食盡無
光其君死月食不盡光輝散臣之憂

月蝕大半以上大水以日支占國

月蝕以旦相及太子當之食以夕君當之

月蝕起南方男子惡之起北方女子惡之起東方少

壯者惡之起西方老者惡之皆為疾疫亡死河圖

帝覽嬉曰月食從上始謂之失國其國君當之從

旁起謂之失令相當之從下起謂之失律將軍當

之又曰從上始謂之赤子食其陰為女喪陽為男

月蝕而青色人多死五穀傷赤色君為客不出一年

黃色有立諸侯國者白色其國有喪或失地其食

盡者五穀貴其分國當之一曰月已食而青色為

憂赤為兵黃土工白喪黑水

月蝕而赤如血有反臣 月蝕東方其月中有惡風

月蝕西方主人利

月蝕而闕且暈國君惡之有軍必戰無軍兵起一曰

隋所食伐之利 月蝕而有氣從外入月中主人

不利從中出外客不利氣從南行南軍不利北行

北軍不利東西亦如之氣所之之方敗也 月初

生蝕而將敗于野

月初生三日而食是謂火殃其國有喪十日至十四

日而天下兵起女主凶 月不望而食或望後食

其國大水溢大臣死后妃有憂以日占國 月蝕

望前天子弱大臣強不能立功成事又曰月未盈

而食陰道消女主憂過盈食盡宮中憂

月蝕而有輝氣蒼色虫蝗生大臣災有大水民流亡

以日辰占其地 月春食歲惡將軍死國有憂一

曰穀貴荊州占曰月孟春食賤人當之仲春食貴

人當之季春食人主憂夏食早一曰國有大憂一

曰虫生秋禾不成秋食兵起一曰邊有兵民不安

西方灾冬食其國饑有女喪一曰將有憂一曰春

多潦女主憂已上皆以日辰占其野

月春食東方夏食南方秋食西方冬食北方

皆為其方兵起

月蝕十二月占

正月月食有灾早一曰賤人災齊國惡米貴 二月

月蝕貴人病魯國惡六畜貴 三月月蝕大人憂

楚國惡絲綿貴 四月月蝕民饑流亡 五月月

蝕旱梁國惡六畜貴 六月月蝕旱沛國惡六畜

貴 七月月蝕兵起陳國惡絲綿貴 八月月蝕

兵起鄭國惡魚鹽貴 九月月蝕兵起韓國惡六

畜貴 十月月蝕兵起魏國惡之 十一月月蝕

女主凶喪趙國燕國弱惡 十二月月蝕有大水

秦國惡

月以甲子乙丑日蝕年多魚禾黍傷丙丁日年豐戊

巳日下田庚辛日高田凶壬癸日歲和

戊日月食大臣下獄一曰大臣死一曰有自縊死者

巳日月食山崩壞城郭大水溢內臣黜后不康臣

民災皆以日辰占其分日支占同

月食在辰巳地未年麥傷食在午未地秋稼凶食在

子午地女主當之食子午卯酉地大水損禾稼壞

城郭有疾疫以日辰占其分國 月食地中出而

虧天下大飢 兩月並食天下大亂

凡月食無兵在外殃在其國兵將起而日食所當之

國戰不勝若有兵在外而月食其鄉有大戰拔城

邑食將盡將死食不盡軍敗荆州占曰軍在外而

月食將還其國戰不勝 月食盡者軍必歸不盡

軍自止 凡用兵從食處擊之勝 月食而有星

入月魄中兵起 月食盡在陽日占在大臣陰日

占在妃夫人 凡月生三日無魄其月必食 月

行與木同宿而食粟貴民相食農官憂 月行與

火同宿而食天下破亡有憂 月行與土同宿而

食國以飢亡 月行與金同宿而食強國戰不勝

亡城大將有二心 月行與水同宿而食其國有

女亂由是而亡

月五星相干犯占

月犯歲星其宿國飢晉亡曰其分歲飢人流黃帝占

曰刑獄煩多盜賊一曰有邊兵一曰其分主死又

為民疫一曰相有凶 月乘歲星相死有大戰其

野有拔城一曰其分主死

月貫木星有流民不出十二年國以飢亡

月與歲星同宿其年有疾疫粟貴人相食農官憂一

曰女主凶有大戰 月與歲星同光國以飢亡一

曰臣強巫咸曰相死國飢二年一曰其國且以女

樂亡 月食歲星軍飢大臣誅一曰邦無主人相食

月吞歲星其國敗亡不出十二年 月食歲星而暈

女主凶其國大飢有大戰

歲星入月相以地黨之諛去一曰不出一旬天下有

大災粟大貴不出二年天下亡徒為亂有野兵荆

州占曰臣弒主 歲星食月有大喪女主死臣為

逆國易主 歲星犯月其野有逐相 歲星逆行

犯月法令散

晉惠帝大安二年十一月庚辰歲星入月中占曰

臣犯主有逐相其後左將軍陳昉奉帝至成都敗

績兵逼乘輿後二年帝崩

穆帝升平元年十一月壬午月掩歲星在房豫州
分野二年乙亥月又犯歲星在房三年豫州刺史
謝萬夫敗八月卒

魏始光三年正月歲星食月在張四年六月帝攻
赫連昌於統禹大破之

唐天寶十四年月食歲星在東井京師分野也明
年長安失

月月犯熒惑有亂臣其國有兵貴人出巫咸曰有兵
戰小吏死一曰女主憂荊州占曰戰勝之國大將
死一曰貴人以兵死國內亂

月犯熒惑而暈或食天下破亡地大半將軍憂

月吞熒惑而暈或食天下破亡國亂兵起有白衣
之聚一曰相及太子當之一曰有內亂帝不終荆
州占曰天下滅亡河圖帝覽嬉曰其國以兵致飢
而以亂亡 月掩熒惑其地大敗 月齧熒惑其
分國軍破敗

月與熒惑合其宿國主死海中占曰其國不可以有
為貴人傷有內兵 月與火星合光芒相及國有
內亂三年不解太子死 月與火同宿而食月在
火北禾不熟在火南菓實在火東天下黜黜在火
西其分兵亂饑一曰有大戰

月與熒惑同光有叛臣內亂且饑

熒惑食月諛臣貴後居宮有女害王者又曰國敗

熒惑犯月有亂臣一曰諸侯有相謀者

熒惑入月及近月七十以內人主惡之一曰主信諛

邪人用一曰熒惑入月憂在宮中有盜賊一曰有

亂臣在側相死黃帝占曰有兵喪海中占曰以戰

不勝荊州占曰臣叛主一曰其分兵且旱不出五

月一曰女戚為政天下亂逆行則其災大

熒惑觸月上角相憂中央主憂下角將憂

熒惑貫月陰國亂其國貴人兵死國不可伐其國不

出五年亡

漢宣帝地節元年正月戊午夜月食熒惑在角亢
占曰憂在內宮非賊乃盜也有內亂奸臣在旁後
四年霍氏謀反伏誅

後魏元興四年正月庚申月犯熒惑在昴七月月
食熒惑占曰兵起五年澤劉逸自號東征將軍

唐武后長安二年熒惑入月歲餘張柬之昌宗兄
弟伏誅

月犯填星女主喪敗一曰有黜后一曰為亡地不出

十二年國以饑亡一曰天下有大喪荊州占曰其
國貴人以兵死天下亂一曰先舉事者敗天下有
大風之災

月食填星其地人民流亡女主憂又曰為兵飢為喪

一曰其國以伐亡一曰以殺而亡天官書曰下犯
上一曰民流千里一曰國以女亂而亡 月乘土

星地動不則天裂 月與土合其下國饑 月與

填星同光以其日月食且有以移徙亡者若星動

搖其下亡地

填星入月中臣賊主一曰不出四十日有土工事乙
巳占曰貴人絕無後一曰女主死 填星食月有

喪女主凶 填星貫月國內亂不出五年亡

月犯太白有兵大戰一曰將有二心一曰人主惡之

荊州占曰月犯太白天下靡散河圖帝覽嬉曰強

侯作難以戰不勝一曰太白與月相犯國多盜寇

月食太白強國以戰亡一曰其分主人死荊州占曰

臣弑主亦受誅一曰國君亡 月掩太白王者亡

地 月吞太白有兵戰國亡 月戴太白有粹兵

期五日 太白出月下芒相反君死民流

月出三日刺太白之陽大國勝小國損 月生三日

刺太白之陰兵在外者未及入在內者不及出南
方為陽北方為陰

月與太白同出城守者賣城宜更其守者

月與太白合宿太子死主憂 月與太白會在南南

國凶在北北國凶 月與太白同光其月月食其
下兵亡

太白與月爭光大戰相去五寸有拔城二寸軍憂三
寸天子罷相六寸天下有兵三尺有憂城一尺有
拔城五尺以外無咎

太白食月易大將一曰將死一曰臣犯主

太白入月中其國戰不勝亡地海中占曰有分國立
王一曰其分兵起一曰將死一曰臣謀主不成又

曰有內惡國失政大臣作亂荊州占曰軍失主將

太白入月中而不出客將死出者主人死武審占曰

太白入月中而不見客死其星見主人死無軍則

大軍當之乙巳占曰太白入月不見星臣為逆

月弦太白侯王為逆 太白犯月刑理失均自毀法其

太白貫月期不出六年國有大兵戰敗亡地一曰國

以亂亡 月生三日侯太白夕出西方與月相並

間容一指軍在外期十日有破軍殺將主勝容二

指期十五日有破軍死將客勝一曰主人小勝客
三指期二十日有破軍死將客軍大勝主人亡地
客四指期二十五日客軍入境主人不勝客五指
期三十日軍陳不戰

月未盡三日候太白晨出東方與月相並中間客一
指入月三日有破軍死將主人不勝客二指入月
九月主人軍大敗失地客三指入月十五日有破
軍死將主人亡地客四指入月二十日客軍大敗

客五指入月二十七日軍陳不戰其法開一日舉
指準之

太白始夕見西方在月北為得行在月南為失行用
兵先起者敗巫咸曰八月三日候太白夕出西方
在月南中國戰勝負海之國敗在月北負海之國
勝中國敗秋冬八月三日太白出西方居月北軍
強居月南軍弱

太白始晨見東方在月南為得行在月北為失行是

謂反生不有破軍必有屠城北國當其殃至咸曰
月未盡三日候太白晨出東方在月北中國不勝
負海之國勝在月南中國勝負海之國不勝無軍
在外以月生三日夕候太白出西方以月未盡三
日晨候太白出東方與月相並容三指其國有兵
憂容二指有城憂容一指有偏將戰占曰太白出
月右陰國有謀出月左陽國有謀 月挾太白諸
侯將相不相親

漢明帝永平十五年十一月乙丑太白入月中後
三年帝崩

晉元帝大興三年十二月己未太白入月在斗其
後有王敦之亂 安帝義熙二帝十月丙午月掩
太白在危五年四月劉裕北伐南燕滅之

月月犯辰星兵起上卿死或曰廷尉憂之軍畧曰月
與水薄主死京房曰天下大水

月食辰星其國有女憂有水飢一曰其國以女亂亡

一曰所當之國戰不勝

月與辰星會合其宿國兩水敗物一曰兵起其國亡地又曰其分人流亡

辰星與月同光其國且以女樂亡一曰有大水

辰星入月中臣叛主荊州占曰有水有刑事起又曰

賊臣欲弑主不出三年必內有惡武暴占曰辰星

入月而見其國君氣入而星不見大臣死北方之

國當之一曰辰星入月君臣俱死一曰其下有火

戰亡國不利奉先者又曰內謀起冬大雪又曰辰

星入月人主戰敗亡地一曰牛馬疫粟貴

辰星食月大水一曰臣有匿謀不出三十日 辰星

貫月其國以子女亂

辰星與月犯有水行事起因而匿且有火水一曰春

夏大水

漢大始四年七月丙辰辰星在翼月犯之至地節元

年楚王延及自殺二年霍氏謀反族誅

晉孝武太元二年十月戊子辰星入月在危時潮
水入石頭城冬春大雪牛馬病死穀五倍

凡月食五星其國皆亡歲以飢熒惑以亂填以殺太
白以強戰辰以女亂或曰月食五星大臣相譖死
五星入月其野有逐相太白將僂或曰五星食月天
子殺同姓

月暈五星占

月暈五星其國主死武容曰此謂五星相近而月暈

盡之及也

凡月暈五星皆為兵星色明客勝不明主人勝暈色
明不明亦如之 月暈回木星人主病大水傷五
穀一曰女主死一曰粟貴人相食一曰兵起一曰
有赦一曰天下有女子之憂其國主不安三復之
相死一曰相出戰不勝死五復之國君死

月暈木星在辰有赦令若軍在外月暈木星星色赤
主人戰敗 月暈木星而月食天下饑有大戰女

主凶 月食木星而暈亦如之

月暈回火星女主凶 一曰星所守國主亡 一曰兵在野大戰無兵大旱兵起 一曰客兵入寇掠三復之君死 月暈火星而又犯之將軍以憂死

月暈火星而攝提在其中天子之兵橫行天下大亂諸侯分政有興兵與上爭王者 月暈火星而食其分國亡 月食火星而暈亦如之 又曰其下有破軍亡地

月暈回土星其國有土工女主失勢 巫咸曰其國主死天下旱高宗占曰所在國兵起戰不勝 一曰后妃死不則亡地 三復相之相死土工大動兵起 女主憂五復之國君死 月暈土星在參五年有赦 月暈土星而食為兵喪女主死其國兵興 月食土星而暈亦如之

月暈金星其國受兵戰不勝 金星土合其君在外 一曰月暈金星所宿兵起或曰人主凶亦為旱災

三復之相凶五復之君凶 月暈金星而月食有

兵大戰國亡一曰大將有二心 月食金星而暈

亦如之

月暈回水星所宿國有水災再合再解其國敗主死

海中占曰月暈水星在春大旱在夏主死在秋大水

在冬大喪河圖帝覽嬉曰在春夏有水民病寒熱

在秋冬有憂兵起不即有大水大憂主死 月暈

水星在角亢二重如連環大臣有謀 月暈水星

而食為大水大饑有女亂 月食水星而暈亦如

凡月暈木火四季土金而其星惡者皆為其國之分

主死國亂大凶

凡月暈五星諸占多以為凶而間有言吉者如乙巳

占曰月暈土星所宿國有福德亦自與其上下文

相戾軍畧例中又以月暈木星為大瑞今詳著一

書中多有可疑必是後人雜以偽文欺用庸主斷

非李淳風真本但乙巳正占必有旨意大抵觀象

要在察色若暈得王氣或五色相生鮮明潤澤而
月與星皆不失常色光明溫潤大小相承色不違
時行不失次則為吉無疑若月光昏昧星色異常
進退舛錯芒角猛怒暈色枯燥刑剋黯如死灰則
當以凶禍言之要在詳審也

流星客星彗星犯月占

流星入月中而無光兵起 流星入月中而有光不
出三年有亡國星出則復立又曰使星入月女主

疾又曰君失地又曰將軍戮死荆州占曰奔星入

月臣有謀 流星落月上下其國亂

客星入月臣害主 月中有星天下有賊星多者
賊多也

彗星犯月中央兵大起期十二年大饑若彗星犯月
而月無光不出期年國亡即而出則亡國復立

彗星觸月臣叛主 彗星貫月臣謀主 彗星出
月上兵起將死一曰四夷來侵

觀象玩占卷之五

五星總序

五星為五德之主其行或入黃道之裏或出黃道之表猶月之行有陰陽也其東行曰順西行曰逆順則進而疾逆則退而遲不東不西曰留與日相近而不見曰伏與日同度曰合其留行逆順掩合凌犯變色失次芒角動搖皆以時政五常五事之德失而見其變亦火土三星行遲夜半經天皆與日

合度而後順行漸遲追日不及晨見東方行去日
稍遲朝而近中則留留經旦過中則逆行逆行至
夕時近中則又留留而又順先遲漸疾以至於夕
伏西方乃更與日合也金水二星行速而不經天
自始與日合之後行速而先日夕見西方去日前
稍遠夕時欲近南方則漸遲遲極則留留而近日
則逆行而合日在于日後晨見東方逆極則留留
而後遲遲極去日稍遠且時近南方則速以追日

晨伏于東方復與日合此五星合見遲速逆順留
行之大槩也昏旦者陰陽之大分也南方大陽之
位天地之經也七曜行至陽位當天之經則虧
留逆而不居此天之常道也三星經天兩星不經
天參天兩地之道也凡五星見伏留行遲速逆順
應曆數為得行遠曆錯度失路盈縮則為亂行亂
行則為天矢孛彗而有亡國敗軍死喪水旱飢饉
之禍云

古曆五星並順行秦曆始有金火之逆甘氏曰同時自有差異漢初測候乃知五星皆有逆行其後相承鮮能察識至北魏末清河張子信避亂隱于海島積三十餘年專以渾儀測候日月五星始叅日日交道有表裏疾徐五星見伏有感召向背言曰日行在春分後則徐秋分後則疾合朔月在日道裏則日食在日道外則雖交不食月望值交則食不問表裏月行遇木火土金四星向之則速背之

則遲五星行四方列宿各有好惡其所遇在好則留多而行遲見早其所遇在惡則留少而行速見遲與常數並差少者差至五度多者至三十許度其辰星之行見伏尤異晨見應在雨水後立夏前夕見應在處暑後霜降前並不見啟蟄立夏立秋霜降四氣內晨夕去日前後三十六度內十八度外有水火土金一星者見無者不見後張胃玄劉焯等依此差度為定入交食分及五星定見定行

與天密會曆法至此始造妙矣

李淳風曰凡五星之行不敢亂常越次猶如月有弦望晦朔是故歲星熒惑填星辰見于日後行遲於日當平旦之時遇至午上便留留而平旦過午反則逆行行至于夕時又欲當午上則便留留而午則又順行行極而伏與日合則當宿共度而受命于日更辰見於東方此皆不敢以昏旦之時當午也至於金水二星則又甚焉辰見東方平旦當丙

巳之地更速行以追日及之而伏伏與日合合復出於西方速行昏時至未丁之地即遲行近日而又伏焉此則五星皆不昏旦當午而盛也五星伏見日數各殊遲速逆順其數不等求之見伏大較同一術焉

五星占法

五星歲星為穀主熒惑為旱主填星為土主太白為兵主辰星為水主五星各有常色各有本躔歲星

色青如參左肩熒惑色赤如心大星一曰如大角
填星色黃如參右角太白色白如狼又曰如五車
大星而有光辰星色黑如奎大星其常也不失本
色而應四時則吉变色則凶

五星色青圓為飢為憂赤圓多旱而爭赤中不平為
兵黃圓國有喜一曰女主有喜白圓為喪為兵黑
圓為水為病青角為兵憂赤角兵犯我城黃角地
之爭白角為兵黑角哭泣聲又為水災

五星之色皆欲其順四時春青夏赤秋白冬黑四季
之月黃則吉其于列國也則明勝暗喜勝怒五星
同色天下偃兵百姓安寧歌舞以行

五星色忽變其占青為憂赤為旱為爭黃為喜白為
兵黑為疾病死喪

五星木色白火色黑土色青金色赤水色黃其國必
敗水為飢火為旱火災土為土金為兵水為水災
巫咸曰吉凶憂患各以色變言之將有兵金星變

將有喪土星變將有飢木星變將有旱火星變將
有水水星變

五星守二十八舍各以其色占其禍敗歲星守木星
其色白熒惑守火星其色黑填星守土星其色青
太白守金星其色赤辰星守水星其色黃必敗

五星所出所行所值之辰其國為得位歲以德熒惑
以禮填有福太白兵強辰陰陽和所行所直之辰
順其色而有角者勝其色害者敗居實有德居虛

無德也色勝位行勝色行德盡勝之

凡五星歲星為政緩則不行急則過分逆則占熒惑
緩則不入急則不出遠道則占填緩則不還急則
過舍逆則占太白緩則不入急則不出逆則占辰
星緩則不出急則不入非時見則占五星不失其
行其年穀豐登

營室為清廟歲星廟也心為明堂熒惑廟也南斗為
文太室填星廟也元為䟽廟太白廟也七星為員

官辰星廟也五星行至其廟謹候其命

五星木土以逆行為凶火以勾己為凶金以出入不時為凶水以不效凶五凶並見其歲惡

五星皆出中道天下太平出陽道則早出陰道則水中道者兩角之間房之中間畢之天街南北河戌之間皆是也

五星不行天門為有喪不道東西咸皆為有賊

五星不出兩河戌間必有道不通

五星分之天中積於東方中國利積于西方外國用

兵者利

五星皆逆行臣且誅君

五星俱見其

年必不善 五星並晝見天下別造中國諸侯列

土為王 五星與日月爭光臣與主爭

五星变色進退喜怒皆與時氣相應金不可怒于火之鄉巳午是也木不可怒于金之鄉申酉是也水不可怒于土之鄉辰戌丑未是也火不可怒于水之鄉亥子是也土不可怒于木之鄉寅卯是也怒

者形色猛盛芒角四出也皆為兵災其变色之日亦以此占之木為飢兵火為旱兵土為土工兵起地震金為兵水為大水疾疫兵喪

五星起怒芒角四達其形未變是謂戒兵其星形變而銳上小下大狀如拔劍是謂成刑不可後救監甲利兵以律不祥 五星有三角者兵息有五角者兵行多角則戰

五星反羽其下國不可久處反羽者光芒上大下小狀如反羽也却萌曰五星之常形行即乘芒下大上銳及其倒行而反芒謂之反羽

五星之變以王時則王者之事以相時則將相大臣之事以囚時則囚徒之事以休時則萬民之事

五星行二十八舍星相近七寸內及宿者其國君災五星逆行去宿雖非七寸內而守之者其國君死于兵順守之則以病死 五星守列宿若已去之復居之環繞成句巳乍大乍小乍明乍暗是謂絕

嗣其禍大

五星起怒凌犯留守列舍察其守犯審其始留之日
觀其色氣相和相賊以決其災視其色變以知吉
凶之情別則光芒所指以知兵起所加之鄉芒多
而雉者謀而未成芒少而長者有謀而成而氣專
而上行從一而至四是謂道極或東或西或南或
北已四其下必有亡國遇四已上未可命也

五星守二十八舍其中外官星亦各有五行所屬不
相賊害為吉若有賊害各以其官占其事

五星守木星有木異守火星有火異守土星有土異
守金星有金異守水星有水異

凡五星入次而次上二三宿曰盈燥急象也失次而
下二三宿曰縮畏退之象也光色潤澤溫和曰喜
順慶之象也光芒明威威猛曰怒暴開之象也光
昏震閃明滅曰動不安之象也光曜生鋒曰芒角
長四出曰角又曰五寸以下謂之芒七寸以上謂

角又長而偏出曰彗正旌者芒也旗所指凶戰則
隨旗所指擊之

凡五星之行各有遲疾如其曆數亦歲行一舍水一
年而亦周天火二年而一週夫歲星近日則遲遠
日則疾熒惑近日則疾遠日則遲填星平行無大
遲疾金木附日而行此其大槩也同舍曰合相擊
曰闕行而掩之曰襲行而侵之曰犯行而直冲之
曰觸未其旁居之曰守未當來而來曰入未當去

而去曰出西入東出曰貫行而造其中曰入行隨
其後曰徙自上而壓之曰乘自下而上往胃之曰
凌經者過其中而無所犯也刺者過其旁而光犯
之也應者旁而相迫也掩者滅之也環者繞之周
也繞者環之不周也勾如勾字之狀已返返如已
之勢牡曰日以五行相克論夫在陽妻在陰是謂
相承二星相近其殃乃大相遠無傷七寸內必之
凡五星守犯列宿占曰或兵或喪或水或旱或疫未

舊唐書卷一百一十五
知的從宜以色占庶幾可準青為憂病赤為兵旱
白喪黑水黃吉凶則為土工此其畧占分野則以
宿度以日辰天下有分有合相以地方參以人事
不可膠柱調瑟

凡歲月日時所生甲為齊乙為夷丙為楚丁為江淮
南蠻戊為中國己為韓魏庚為秦華山以西西夷
之地壬為燕趙癸為恒山北夷之國子遼丑狄翟
亦遼東寅為楚卯為鄭辰為晉巳為衛午為魏未

為中山梁宋申為齊酉為魯戌為楚亥為燕代巳
上歲月日辰時及見災所在之地同用假令丙辰
年七月丁卯日午時災見于未地太歲在丙辰晉
七月中又為齊卯又為鄭午魏未為中山梁宋則
是其地各有災也

凡五星王則光芒相以光實斲則光而無角不動囚
則無光芒死則色微小也

凡言陽國陰國者從東維西盡南維北為陽陽主中

國故曰陽陽者南也從北而西主陰國主負海國
故曰陰國者夷狄之國也

五星冠珥大臣逐 五星流其分民飢流亡

五星盈縮失次其精降于地人歲星主貴人熒惑降
為童兒歌謠嬉戲填星為老人婦女太白為壯夫

處于林麓辰星為人無所不為吉凶之應隨其象

五星行次各有常準角中間亢南一度氐中央房中
道心北二尺有半尾北三尺箕北二尺半虛二度

危二度室南二度壁二尺半奎二度婁二度胃三度

昴一度畢北二度參北三度五寸觜二度井五度

鬼南二度柳三度星三度張三度翼四度軫度已

土並五星常行之道一尺為一度若多少不同則

謂之失行亦曰失行一尺之下猶輕已上漸重近

為旱飢兵逆水死喪疾病石氏五星曰五星更出

司不祥應節守道不為殃日滿不入其事興過時

不出陰謀行以星所守占厥方芒角變動非其常

審察五色別青黃各以事類知災祥

凡五星之行各有遲疾如其曆數木星行一舍土三年行一舍金水一年一周夫火二年一周夫木近日則遲遠日則疾火近日則疾遠日則遲土平行無大遲疾金水附日而行此其大概也 凡五星所在大於常其分興小於常分不昌

凡五星東行為順西行為逆合而前為盈退而後為縮一曰失次而上二三宿曰盈燥急之象也失行

而下二三宿曰縮畏退之象也光澤潤色溫和曰喜順慶之象也光芒明盛威猛怒暴曰閉之象也光體震閃明滅曰動不安之象也光曜外出生鋒曰芒角長四出曰角又曰五寸以下謂之芒七寸以上謂之角長而偏出曰彗芒謂之正旗所指受殃戰則隨其所指擊之勝

凡五星同度曰合石次曰光芒相及曰合巫咸曰相曰合荊州占曰相去一尺內曰合同宿曰聚亦

謂之會一曰光芒相逮曰會却萌曰留三日曰會
未當去而去曰出未當來而來曰入行而造其中
曰入入宿度而居曰舍石氏曰行度所居舍入此
宿石氏曰留二十日已上宿處其所甘氏曰行所
當行過二十日不失次石氏依度至而不上不下
不東不西而留却萌曰住不移而留來其旁而守
之不去却萌曰亡十日已上而守甘氏曰徘徊不
失其度守行侵之犯經過其星光曜侵之犯古占
七寸以內而犯未央相離五寸光芒不接為災亦
輕若相離雖一尺以外光氣相射亦以犯占先犯
而遂留之犯守之未當入度經而犯之侵東西正
當自下而上壓之曰來自上而下直往冒之曰凌
沖止觸一曰兩動直前相抵曰觸一曰行
而前沖之相凌曰開甘氏曰合復離復合曰開常
昭曰相擊曰沖行而掩之曰襲行而隨其後曰從
西入東出曰貫相切曰磨周之一匝曰環環之而

不周曰繞迫而侵之曰薄勾者左去右廻右去左
廻如勾字之狀也巳者往而如巳之形也甘氏曰
去而返而勾再勾爲巳石氏曰東西爲勾南北爲
巳却萌曰行如勾巳刺者過其旁而光射之也掩
者冒而滅之也刺者過其旁光射之也主有所立
星戴月爲死喪貫而兵出之

凡五星守犯列宿皆爲凶咎若逆行或環繞勾巳之
其災尤大也

五星占

五星歲守木星熒惑守火星填星守土星太白守金
星辰星守水星是謂五重之氣也法曰氣是謂重
施過節民多疾病五穀不成災害並生一曰天下
旱萬物不成

五星歲守土星熒惑守金星填星守水星太白守木
星辰星守火星是謂守所勝上克下之象也法曰
賦斂重徭後煩下民屈竭莫之供故下皆惡其上

則強凌弱衆暴寡是故盜賊衆多兵革並起

五星歲守火星熒惑守土星填星守金星太白守水
星辰星守木星是謂母守其子也陽不施之象法
曰陽氣不足故多水災五穀不成

五星歲守金星熒惑守水星填星守木星太白守火
星辰星守土星是謂守所不勝下克上之象也法
曰臣民侵陵其主君弱臣強主威不振故奸臣賊
子有謀上之心

五星歲守水星熒惑守木星填星守火星太白守土
星辰星守金星是謂子守其母陰氣不成之象法
曰陰氣不足故旱多火災萬物不成

